

Na osnovu člana 12. Zakona o Direkciji za finansije Brčko distrikta Bosne i Hercegovine („Sl. glasnik Brčko distrikta BiH“, br. 16/24 – prečišćeni tekst), člana 10. Zakona o računovodstvu i reviziji u Brčko distriktu Bosne i Hercegovine („Sl. glasnik Brčko distrikta BiH“, br. 22/16 i 50/18), člana 2. stav (5) Odluke o visini naknade za usluge Sektora za obradu finansijskih izvještaja i licenciranje Direkcije za finansije Brčko distrikta Bosne i Hercegovine („Sl. glasnik Brčko distrikta BiH“, br. 10/19 i 24/20) a u skladu sa Zahtjevom za ustupanje podataka broj: 13.3-04.1-717/25 od 02.06.2025.godine, zaključuje se:

UGOVOR **o ustupanju prava na korištenje podataka**

Između:

1. Direkcija za finansije Brčko distrikta Bosne i Hercegovine (u daljem tekstu: Direkcija), ul. Miroslava Krleže br.1, Brčko, JIB: 4600082130006 koju zastupa direktor Direkcije Janja Geljić, dipl. oec. i
2. Company Wall d.o.o. Bijeljina (u daljem tekstu: Naručilac), Nikole Tesle br.10, Bijeljina, JIB: 4404511450002, kojeg zastupa Klemen Kljun, direktor.

Predmet ugovora

Član 1.

Ugovorom o ustupanju prava na korištenje podataka (u daljem tekstu: Ugovor) regulišu se prava i obaveze između Direkcije, sa jedne strane i Naručioca, s druge strane, o ustupanju prava na korištenje podataka iz Registra finansijskih izvještaja (u daljem tekstu: Registar).

Regulisanje prava i obaveza ugovornih strana odnosi se na ustupanje i korištenje posebnog izbora podataka iz finansijskih izvještaja privrednih društava za 2024. godinu (16 AOP pozicija), putem masovnog ustupanja.

Bitni elementi ugovora

Član 2.

Ugovorne strane su saglasne da su bitni elementi Ugovora:

- a) ustupanje prava na korištenje posebnog izbora podataka Naručiocu putem masovnog ustupanja i
- b) naknada koju Naručilac plaća Direkciji za ustupanje prava na korištenje posebnog izbora podataka putem masovnog ustupanja u skladu sa Odlukom o visini naknade za usluge Sektora za obradu finansijskih izvještaja i licenciranje Direkcije za finansije Brčko distrikta Bosne i Hercegovine („Sl. Glasnik Brčko distrikta BiH“, br.10/19 i 24/20), (u daljem tekstu: Odluka), a u skladu sa Zahtjevom za ustupanje podataka broj: 13.3-04.1-717/25 od 02.06.2025.godine.

Korištenje podataka

Član 3.

- (1) Ugovorne strane su saglasne da Naručilac ustupljeno pravo na korištenje podataka može koristiti isključivo u svrhu koju je naveo u zahtjevu, a to je komercijalni interes Naručioca.
- (2) Ugovorne strane su saglasne da je Naručilac odgovoran i da ne smije dovesti u zabludu Direkciju u vezi sa načinom i namjenom korištenja podataka, sve u skladu sa članom 9. Pravilnika kojim se propisuju uslovi i način za ovlašteno pristupanje i korištenje izvještaja i dokumenata iz Registra za finansijsko izvještavanje („Sl. Glasnik Brčko distrikta BiH“, br.34/17) (u daljem tekstu: Pravilnik).

Član 4.

Komercijalni interes Naručioca podrazumijeva sljedeće:

- a) kreiranje bonitetnih i finansijskih izvještaja, akvizicionih listi po parametrima, analiza industrija, komparativni pregledi za pojedinačne kompanije i industrije i
- b) kreiranje proizvoda putem vlastitog web portala.

Član 5.

Ugovorne strane su saglasne da Direkcija prenosi na Naručioca pravo korištenja, isključivo u svrhu navedenu u članu 3. i 4. Ugovora.

Član 6.

Ukoliko Naručilac želi ustupanje prava na korištenje podataka koji nisu obuhvaćeni ovim Ugovorom ili ustupljeno pravo na korištenje podataka želi upotrijebiti u svrhu koja nije navedena u Ugovoru, dužan je podnijeti novi zahtjev i zaključiti aneks na postojeći Ugovor sa Direkcijom.

Naknada za ustupljeno pravo, način i instrumenti obezbjeđenja plaćanja

Član 7.

- (1) Ugovorne strane su saglasne da će Direkcija sačiniti predračun za ustupanje prava na korištenje podataka u skladu sa važećom Odlukom.
- (2) Ugovorne strane su saglasne da naknada za ustupljeno pravo na korištenje posebnog izbora podataka za 16 AOP pozicija iznosi **0,352 KM** po podatku. Naknada koju je Naručilac dužan platiti iznosi ukupno **9692,67 KM** za 27.536 podataka.
- (3) Naručilac je dužan da izvrši plaćanje naknade dan prije ustupanja podataka.

Vrijeme i način primopredaje podataka

Član 8.

- (1) Ugovorne strane su saglasne da će Direkcija pravo na korištenje podataka ustupiti najkasnije u roku od tri dana, uz prethodno ispunjena dva uslova:

- a) da su obje ugovorne strane potpisale Ugovor i
 - b) da je Naručilac izvršio plaćanje naknade u skladu sa članom 7. stav (3) ovog Ugovora.
- (2) Ugovorne strane su saglasne da će Direkcija tražene podatke ustupiti Naručiocu na elektronskom mediju.

Obaveze i ograničenja Naručioca

Član 9.

- (1) Naručilac je trajno obavezan i odgovoran ustupljeno pravo korištenja podataka koristiti isključivo u svrhu koja je navedena u zahtjevu i Ugovoru.
- (2) Naručilac je trajno obavezan i odgovoran:
 - a) navesti izvor podataka, odnosno u svom krajnjem proizvodu navesti da je izvor podataka Direkcija ili u ugovoru sa klijentom jasno naznačiti izvor podataka;
 - b) naručilac može distribuirati svoje krajnje proizvode/izvještaje putem povezanih i drugih društava, samo ukoliko je Naručilac izričito naznačen kao obrađivač podataka krajnjeg proizvoda/izvještaja koji se distribuira;
 - c) osigurati da se podaci, u izvornom obliku ustupljenom na korištenje od Direkcije zaštite od dalje prodaje i/ili ustupanja u skladu sa članom 9. stav (2) Pravilnika;
 - d) osigurati da se izvorne vrijednosti podataka ne mijenjaju;
 - e) pravilno prezentovati finansijski, imovinski prinosni položaj obveznika izvještavanja, te je u tom smislu dužan osigurati pravo uvida Direkcije u strukturu svojih proizvoda/krajnjih izvještaja koje će Naručilac napraviti korištenjem podataka za koje se pravo ustupa;
 - f) da elektronskim putem (web servis, web portal i dr.) ne može vršiti distribuciju ili prikaz izvornih podataka koji su predmet ovog Ugovora ili aneksa ovog Ugovora.

Ograničenje odgovornosti Direkcije

Član 10.

- (1) Direkcija će podatke iz Registra dostaviti isključivo za one pravne subjekte koji su u skladu sa Zakonom o računovodstvu i reviziji u Brčko distriktu Bosne i Hercegovine („Sl. Glasnik Brčko distrikta BiH“, br.22/16 i 50/18) dostavili uredne izvještaje o poslovanju.
- (2) Direkcija ustupa podatke nakon zvaničnog zaključivanja procesa kontrole i obrade podataka iz finansijskih izvještaja.
- (3) Za tačnost iskazanih podataka u finansijskim izvještajima odgovoran je pravni subjekt koji je obveznik izvještavanja.
- (4) Direkcija garantuje da su podaci iz Registra istovjetni sa podacima iz dostavljenih finansijskih izvještaja pravnih lica.
- (5) Ugovorne strane su saglasne da Direkcija nije odgovorna za moguću štetu i druge posljedice koje Naručiocu i/ili trećem pravnom ili fizičkom licu mogu

nastati zbog ustupanja prava na korištenje podataka iz Registra, ukoliko se Direkcija prilikom ustupanja podataka pridržavala propisa i odredbi Ugovora.

Raskid ugovora

Član 11.

- (1) Direkcija ima pravo, pismenim aktom, jednostrano raskinuti ugovor do momenta ustupanja prava na korištenje podataka, nakon čega prestaje primjena Ugovora.
- (2) Ukoliko Direkcija raskine Ugovor, u smislu stava (1) ovog člana, Naručiocu će vratiti uplaćenu naknadu, ako je uplata izvršena.
- (3) U slučaju da Naručilac prekrši odredbe Ugovora, Direkcija ima pravo oduzeti ustupljeno pravo na korištenje podataka i zadržati pravo na naknadu.

Rješavanje sporova

Član 12.

- (1) Sva druga pitanja koja nisu regulisana ovim ugovorom ili odredbama Pravilnika koje su sastavni dio ovog ugovora, ugovorne strane će rješavati po pravilu sporazumom, na principima povjerenja, poslovnog morala i drugih dobrih poslovnih običaja.
- (2) U slučaju spora nadležan je Osnovni sud u Brčko distriktu BiH.

Član 13.

Ugovor je sastavljen u četiri (4) primjerka od kojih svaka ugovorna strana zadržava po dva (2) primjerka.

Član 14.

Ugovor stupa na snagu danom obostranog potpisivanja.

Broj predmeta: 13.3-04.1-717/25

Datum: 02.06.2025.godine

Za Naručioca:

Direktor
Klemen Kljun



Dana: 09.06.2025.godine

Za Direkciju:

Direktor Direkcije
Janja Geljić, dipl. oec.



Dana: 09.06.2025.godine